



# **UNDANG-UNDANG MALAYSIA**

---

VERSI DALAM TALIAN TEKS  
CETAKAN SEMULA YANG KEMAS KINI

---

**No. 35 tahun 1968**

## **AKTA INSTITUT KOPERASI (PEMERBADANAN)1968**

*Sebagaimana pada 1 Jun 2019*

### **AKTA INSTITUT KOPERASI (PEMERBADANAN) 1968**

Tarikh Perkenan Diraja	... ..	11 September 1968
Tarikh penyiaran dalam <i>Warta</i>	... ..	16 September 1968
Kali terakhir dipinda melalui Akta A1589 yang mula berkuat kuasa pada	... ..	Bahagian II — 1 September 2011; Bahagian III dan IV — 3 Mei 2019

## **UNDANG-UNDANG MALAYSIA**

**No. 35 tahun 1968**

### **AKTA INSTITUT KOPERASI (PEMERBADANAN) 1968**

---

#### **SUSUNAN SEKSYEN**

---

#### **Seksyen**

1. Tajuk ringkas, permulaan kuat kuasa dan pemakaian
2. Tafsiran
3. Penubuhan Institut Koperasi Malaysia
4. Fungsi Institut
- 4A. Kuasa Institut
- 4B. Lembaga Institut
- 4C. Kehilangan kelayakan daripada menjadi anggota Lembaga
- 4D. Penjalanan sementara fungsi Pengerusi
- 4E. Pengosongan jawatan
- 4F. Pembatalan pelantikan
- 4G. Mesyuarat Lembaga
- 4H. Penzahiran kepentingan
- 4I. Lembaga boleh mengundang orang lain dalam mesyuarat
- 4J. Elaun
- 4K. Kesahan tindakan dan prosiding
- 4L. Pelantikan Ketua Pengarah
- 4M. Pelantikan pegawai dan kakitangan
- 4N. Cawangan Institut
- 4O. Kuasa Menteri untuk memberikan arahan
- 4P. Meterai perbadanan Institut
5. Jawatankuasa Pengajian
- 5A. Kuasa Lembaga untuk menubuhkan jawatankuasa lain
6. Kuasa meminjam

## Seksyen

- 7. Kumpulan Wang dan Pemberian
- 7A. Kumpulan Wang Rizab
- 7B. Kumpulan Wang Simpanan Bercarum
- 8. Perbelanjaan Institut
- 8A. Hadiah
- 9. Pelaburan
- 10. Anggaran tahunan
- 11. Akaun dan audit
- 12. Laporan tahunan
- 12A. Akta Perlindungan Pihak Berkuasa Awam 1948
- 12B. Pekhidmat awam
- 12C. Obligasi kerahsiaan
- 12D. Prosiding sivil
- 12E. Perbuatan atau peninggalan yang dilakukan dengan suci hati
- 12F. Kuasa Lembaga untuk membuat kaedah-kaedah dan garis panduan
- 12G. Kuasa Menteri untuk membuat peraturan-peraturan
- 13. Peletakhakan harta dan pemindahan hak dan liabiliti
- 14. Kecualian

JADUAL

## UNDANG-UNDANG MALAYSIA

No. 35 tahun 1968

### AKTA INSTITUT KOPERASI (PEMERBADANAN) 1968

Suatu Akta untuk memperbadankan Institut Koperasi Malaysia, bagi maksud membangunkan dan menggalakkan latihan dan pendidikan koperasi dan bagi mengadakan peruntukan bagi perkara yang berkaitan dengannya.

[1 November 1968, P.U. 422/1968]

**MAKA INILAH DIPERBUAT UNDANG-UNDANG** oleh Seri Paduka Baginda Yang di-Pertuan Agong dengan nasihat dan persetujuan Dewan Negara dan Dewan Rakyat yang bersidang dalam Parlimen, dan dengan kuasa daripadanya, seperti yang berikut:

#### **Tajuk ringkas, permulaan kuat kuasa dan pemakaian**

1. (1) Akta ini bolehlah dinamakan Akta Institut Koperasi (Pemerbadanan) 1968 dan hendaklah mula berkuat kuasa pada tarikh yang ditetapkan oleh Menteri melalui pemberitahuan dalam *Warta*, dan tarikh itu tidak boleh lebih awal daripada tarikh pemberitahuan itu disiarkan.

(2) Akta ini hendaklah terpakai di seluruh Malaysia.

#### **Tafsiran**

2. Dalam Akta ini, melainkan jika konteksnya menghendaki makna yang lain —

“Ketua Pengarah” ertinya Ketua Pengarah Institut yang dilantik di bawah subseksyen 4L(1);

“Kumpulan Wang Rizab” ertinya Kumpulan Wang Rizab yang ditubuhkan di bawah seksyen 7A;

“Kumpulan Wang Simpanan Bercarum” ertinya Kumpulan Wang Simpanan Bercarum yang ditubuhkan di bawah seksyen 7B;

“Lembaga” ertinya Lembaga Institut Koperasi Malaysia yang ditubuhkan di bawah seksyen 4B;

“Institut” ertinya Institut Koperasi Malaysia yang ditubuhkan di bawah seksyen 3;

“Menteri” ertinya Menteri yang dipertanggungjawabkan dengan tanggungjawab bagi pembangunan koperasi;

“tahun kewangan” ertinya tempoh dari satu hari bulan Januari hingga tiga puluh satu hari bulan Disember dalam sesuatu tahun.

### **Penubuhan Institut Koperasi Malaysia**

**3.** (1) Suatu pertubuhan perbadanan dengan nama “Co-operative Institute of Malaysia” atau, dalam bahasa kebangsaan, “Institut Koperasi Malaysia” ditubuhkan.

(2) Institut adalah kekal turun-temurun dan mempunyai meterai perbadanan.

(3) Institut boleh membawa guaman dan dibawa guaman terhadapnya atas nama perbadanannya.

(4) Tertakluk kepada dan bagi maksud Akta ini, Institut boleh, atas apa-apa terma sebagaimana yang difikirkannya patut —

(a) membuat kontrak;

(b) memperoleh, membeli, mengambil, memegang dan menikmati harta alih dan tak alih yang boleh menjadi terletak hak padanya melalui pembelian, atau melalui apa-apa pertukaran, pemberian, derma, pajakan, pemberian berwasiat atau selainnya;

- (c) memindahhakkan, menyerahhakkan, menyerahkan balik, memulangkan, menggadaikan, menjual, menggadaikan, memajak, menukarkan, menyerahhakkan semula, memindahkan hakmilik atau selainnya melupuskan, atau membuat urusan mengenai, apa-apa harta alih atau tak alih apa-apa perihalan atau apa-apa kepentingan dalamnya yang terletak hak pada Institut atas apa-apa terma sebagaimana yang difikirkannya patut; dan
- (d) menjalankan, melaksanakan dan menunaikan, mengikut peruntukan Akta ini, segala kuasa, fungsi dan kewajipan yang diberikan, diperuntukkan atau dikenakan ke atas Institut oleh mana-mana peruntukan.

## **Fungsi Institut**

### **4. Fungsi Institut adalah seperti yang berikut:**

- (a) untuk menyediakan suatu kursus dalam pengajian koperasi dan apa-apa kursus pengajian lain dan membuat apa-apa penganugerahan diploma sebagaimana yang difikirkan patut oleh Institut;
- (b) untuk mencetak atau menerbitkan, atau membantu dalam pencetakan atau penerbitan, buku tentang koperasi atau apa-apa mata pelajaran yang berkaitan dengannya;
- (c) untuk membuat apa-apa kaedah-kaedah sebagaimana yang perlu untuk mengawal selia tanggungjawab dan kawalan pegawai dan kakitangan Institut dan untuk mengenakan apa-apa fi yang kena dibayar berkenaan dengan apa-apa kursus pengajian sebagaimana yang difikirkannya patut;
- (d) untuk menjalankan penyelidikan mengenai perkara-perkara koperasi;
- (e) untuk menyediakan perkhidmatan perundingan;
- (f) untuk menjalankan kursus dalam pengajian koperasi dan apa-apa kursus pengajian lain, secara bersesama atau bersekutu, gabungan,

usaha sama atau selainnya, dengan mana-mana institusi pendidikan tinggi atau badan profesional, atau mana-mana pertubuhan, di dalam atau di luar Malaysia; dan

- (g) untuk menasihati Menteri mengenai perkara-perkara yang berkaitan dengan latihan dan pendidikan koperasi.

### **Kuasa Institut**

**4A.** Institut hendaklah, tertakluk kepada peruntukan Akta ini, mempunyai kuasa untuk —

- (a) menganugerahkan diploma, sijil dan kelayakan yang setaraf kepada orang yang mengikuti kursus pengajian yang dikendalikan oleh Institut dan telah memnuhi apa-apa kehendak lain sebagaimana yang ditentukan oleh Lembaga, atau sebagaimana yang boleh ditetapkan;
- (b) memulakan dan menganugerahkan biasiswa, dermasiswa, pingat, hadiah dan bentuk lain bagi kepujian, anugerah atau bantuan berkenaan dengan latihan, pendidikan dan perkhidmatan berasaskan pengetahuan yang disediakan oleh Institut;
- (c) memberikan pinjaman atau bantuan kewangan untuk pelajar yang memerlukan mengikut apa-apa terma dan syarat sebagaimana yang diluluskan oleh Lembaga;
- (d) memasarkan atau mengkomersialkan perkhidmatan, dapatan penyelidikan dan keluaran Institut;
- (e) meminta dan menerima apa-apa fi sebagaimana yang boleh dari semasa ke semasa ditentukan oleh Lembaga atau sebagaimana yang ditetapkan;
- (f) melakukan apa-apa perkara, sama ada yang bersampingan dengan kuasa itu atau tidak, yang boleh dilakukan bagi pengembangan pendidikan, latihan, kewangan, pentadbiran, kebajikan dan tatatertib dalam Institut; dan



- (g) menubuhkan atau menggalakkan penubuhan syarikat di bawah \*Akta Syarikat 2016 [*Akta 777*] untuk menjalankan atau terlibat dalam apa-apa aktiviti yang telah dirancang atau dijalankan oleh Institut dengan kelulusan Menteri Kewangan.

## **Lembaga Institut**

**4B.** (1) Institut hendaklah ditadbirkan oleh Lembaga Institut yang terdiri daripada anggota yang berikut:

- (a) Pengerusi;
- (b) Pengerusi Eksekutif Suruhanjaya Koperasi Malaysia sebagai Timbalan Pengerusi;
- (c) Ketua Pengarah Institut;
- (d) seorang wakil Perbendaharaan;
- (e) seorang wakil Kementerian yang bertanggungjawab bagi pembangunan koperasi;
- (f) seorang wakil Angkatan Koperasi Kebangsaan Malaysia Berhad (ANGKASA);
- (g) enam orang yang mewakili pergerakan koperasi; dan
- (h) tiga orang lain yang, pada pendapat Menteri, mempunyai kelayakan atau pengalaman dalam perkara yang berhubungan dengan pembangunan, pengendalian atau kebajikan Institut.

(2) Anggota yang disebut dalam perenggan (1)(a), (d), (e), (f), (g) dan (h)—

- (a) hendaklah dilantik oleh Menteri selama tempoh tidak melebihi dua tahun; dan

---

\*CATATAN—Akta ini telah menggantikan Akta Syarikat 1965 [*Akta 125*] mula berkuat kuasa pada 31 Januari 2017—lihat subseksyen 620(1) Akta 777.

hendaklah layak untuk dilantik semula apabila habis tempoh jawatannya.

(3) Seorang pegawai kanan Institut hendaklah dilantik oleh Lembaga sebagai Setiausaha kepada Lembaga tetapi tidak mempunyai hak untuk mengundi.

(4) Anggota Lembaga yang dilantik di bawah perenggan (1)(a), (d), (e), (f), (g) dan (h) boleh pada bila-bila masa meletakkan jawatannya melalui surat yang dialamatkan kepada Menteri.

(5) Jika seseorang anggota yang dilantik di bawah perenggan (1)(a), (d), (e), (f), (g) dan (h) berhenti menjadi anggota Lembaga, Menteri boleh melantik seorang yang lain untuk mengisi kekosongan itu bagi baki tempoh yang anggota yang mengosongkan jawatan itu dilantik.

(6) Tertakluk kepada Akta ini, Lembaga boleh menentukan tatacaranya sendiri.

### **Kehilangan kelayakan daripada menjadi anggota Lembaga**

**4c.** Seseorang hendaklah hilang kelayakan daripada dilantik atau menjadi anggota Lembaga—

- (a) jika dibuktikan terhadapnya, atau dia telah disabitkan atas suatu pertuduhan berkenaan dengan—
  - (i) suatu kesalahan yang melibatkan fraud, kecurangan atau keburukan akhlak;
  - (ii) suatu kesalahan di bawah undang-undang yang berhubungan dengan rasuah;
  - (iii) suatu kesalahan di bawah Akta ini; atau
  - (iv) apa-apa kesalahan lain yang boleh dihukum dengan pemenjaraan (sama ada pemenjaraan sahaja atau sebagai tambahan kepada atau sebagai ganti denda) selama tempoh lebih daripada dua tahun;
- (b) jika dia menjadi bankrap; atau

- (c) jika dia telah didapati atau diisytiharkan sebagai tidak sempurna akal atau selainnya menjadi tidak berupaya untuk menguruskan hal ehwalnya.

### **Penjalanan sementara fungsi Pengerusi**

**4D.** (1) Jika Pengerusi atas apa-apa sebab tidak berupaya untuk melaksanakan fungsinya atau semasa mana-mana tempoh kekosongan jawatan Pengerusi, Timbalan Pengerusi hendaklah melaksanakan fungsi Pengerusi.

(2) Jika kedua-dua Pengerusi dan Timbalan Pengerusi atas apa-apa sebab tidak berupaya untuk melaksanakan fungsi Pengerusi atau semasa apa-apa tempoh kekosongan jawatan Pengerusi dan Timbalan Pengerusi, Menteri boleh melantik mana-mana anggota Lembaga untuk melaksanakan fungsi Pengerusi.

(3) Timbalan Pengerusi atau anggota yang dilantik di bawah subseksyen (2), mengikut mana-mana yang berkenaan, hendaklah, semasa tempoh dia melaksanakan fungsi Pengerusi di bawah seksyen ini, disifatkan sebagai Pengerusi dan hendaklah mempunyai segala kuasa Pengerusi.

### **Pengosongan jawatan**

**4E.** Jawatan seseorang anggota Lembaga yang disebut dalam subseksyen 4B(1) hendaklah menjadi kosong—

- (a) apabila anggota itu mati;
- (b) apabila anggota itu meletakkan jawatan melalui surat yang dialamatkan kepada Menteri; atau
- (c) apabila habis tempoh atau pembatalan pelantikannya.

### **Pembatalan pelantikan**

**4F.** (1) Menteri boleh membatalkan pelantikan seseorang anggota Lembaga yang disebut dalam perenggan (1)(a), (d), (e), (f), (g) dan (h)—

- (a) jika kelakuannya, sama ada yang berkaitan dengan tugasnya sebagai anggota Lembaga atau selainnya, ialah kelakuan yang memburukkan nama Lembaga atau Institut;
- (b) jika dia menjadi tidak berupaya untuk menjalankan dengan sepatutnya tugasnya sebagai anggota Lembaga;
- (c) jika dibuktikan terhadapnya, atau dia telah disabitkan atas, suatu pertuduhan berkenaan dengan—
  - (i) suatu kesalahan yang melibatkan fraud, kecurangan atau keburukan akhlak;
  - (ii) suatu kesalahan di bawah undang-undang yang berhubungan dengan rasuah;
  - (iii) suatu kesalahan di bawah Akta ini; atau
  - (iv) apa-apa kesalahan lain yang boleh dihukum dengan pemenjaraan (sama ada pemenjaraan sahaja atau sebagai tambahan kepada atau sebagai ganti denda) selama tempoh lebih daripada dua tahun;
- (d) jika dia menjadi bankrap;
- (e) jika dia telah didapati atau diisytiharkan sebagai tidak sempurna akal atau selainnya menjadi tidak berupaya untuk menguruskan hal ehwalnya; atau
- (f) jika dia tidak menghadiri mesyuarat Lembaga tiga kali berturut-turut tanpa mendapat kebenaran secara bertulis daripada Pengerusi, atau dalam hal Pengerusi, tanpa kebenaran Menteri.

(2) Walau apa pun subseksyen (1), pelantikan mana-mana anggota boleh pada bila-bila masa dibatalkan oleh Menteri tanpa memberikan sebab bagi pembatalan itu.

### **Mesyuarat Lembaga**

**4G.** (1) Lembaga hendaklah bermesyuarat seberapa kerap yang perlu tetapi tidak kurang daripada empat kali setahun bagi maksud mempertimbangkan aktivitiinya.

(2) Kuorum Lembaga ialah tujuh.

(3) Jika atas apa-apa persoalan untuk ditentukan oleh Lembaga terdapat undi yang sama rata, Pengerusi hendaklah mempunyai undi pemutus.

(4) Lembaga hendaklah menyebabkan minit semua mesyuaratnya disenggarakan dan disimpan dalam bentuk yang sepatutnya.

(5) Apa-apa minit mesyuarat Lembaga yang dibuat hendaklah, jika ditandatangani sewajarnya oleh Pengerusi, diterima sebagai keterangan dalam semua prosiding undang-undang tanpa bukti selanjutnya dan tiap-tiap mesyuarat Lembaga yang berkenaan dengannya minit mesyuarat telah dibuat hendaklah disifatkan sebagai telah dipanggil dan diadakan dengan sewajarnya dan semua anggota dalam mesyuarat itu layak dengan sewajarnya untuk bertindak.

### **Penzahiran kepentingan**

**4H.** (1) Seseorang anggota Lembaga yang mempunyai, secara langsung atau tidak langsung, dengan sendiri atau melalui pekongsinya—

(a) apa-apa kepentingan dalam mana-mana syarikat atau pengusahaan yang dengannya Lembaga bercadang untuk membuat kontrak; atau

(b) apa-apa kepentingan dalam mana-mana kontrak itu atau dalam apa-apa perkara yang sedang dibincangkan oleh Lembaga,

hendaklah dizahirkan kepada Lembaga mengenai hakikat dan jenis kepentingannya.

(2) Penzahiran di bawah subseksyen (1) hendaklah direkodkan dalam minit mesyuarat Lembaga dan, melainkan jika dibenarkan secara khusus oleh Pengerusi, anggota itu tidak boleh mengambil bahagian dalam apa-apa

pertimbangtelitian atau keputusan Lembaga yang berhubungan dengan kontrak atau perkara itu.

(3) Tiada tindakan atau prosiding Lembaga boleh ditidaksahkan atas alasan bahawa mana-mana anggota Lembaga telah melanggar seksyen ini.

### **Lembaga boleh mengundang orang lain dalam mesyuarat**

**4I.** (1) Lembaga boleh mengundang mana-mana orang untuk menghadiri mesyuarat atau pertimbangtelitian Lembaga bagi maksud menasihati Lembaga mengenai apa-apa perkara yang sedang dibincangkan tetapi orang itu tidak berhak untuk mengundi dalam mesyuarat atau pertimbangtelitian itu.

(2) Seseorang yang diundang di bawah subseksyen (1) boleh dibayar apa-apa elaun sebagaimana yang ditentukan oleh Lembaga.

### **Elaun**

**4J.** Anggota Lembaga yang dilantik di bawah subseksyen 4B(1) dan anggota mana-mana jawatankuasa yang dilantik di bawah seksyen 5A boleh dibayar apa-apa elaun sebagaimana yang ditentukan oleh Menteri.

### **Kesahan tindakan dan prosiding**

**4K.** Tiada tindakan yang dilakukan atau prosiding yang diambil di bawah Akta ini boleh dipersoalkan atas alasan—

- (a) suatu kekosongan dalam keanggotaan, atau kecacatan dalam perlembagaan, Lembaga; atau
- (b) suatu peninggalan, kecacatan atau ketidakteraturan yang tidak menyentuh merit kes itu.

### **Pelantikan Ketua Pengarah**

**4L.** (1) Menteri hendaklah melantik seorang Ketua Pengarah atas apa-apa terma dan syarat sebagaimana yang ditentukan oleh Menteri.

(2) Ketua Pengarah hendaklah memegang jawatan selama tempoh yang tidak melebihi tiga tahun dan adalah layak untuk dilantik semula.

(3) Lembaga hendaklah meletakhakkan pada Ketua Pengarah apa-apa kuasa dan hendaklah mengenakan ke atasnya apa-apa kewajipan sebagaimana yang ditentukan oleh Lembaga.

### **Pelantikan pegawai dan kakitangan**

**4M.** (1) Institut boleh melantik, atas apa-apa terma dan syarat perkhidmatan sebagaimana yang diluluskan oleh Lembaga, apa-apa bilangan Timbalan Ketua Pengarah, pegawai dan kakitangan lain, sebagaimana yang perlu untuk menjalankan maksud Institut.

(2) Timbalan Ketua Pengarah hendaklah tertakluk kepada arahan dan kawalan Ketua Pengarah dan boleh melaksanakan segala kewajipan Ketua Pengarah di bawah Akta ini.

### **Cawangan Institut**

**4N.** (1) Lembaga boleh menubuhkan dan menyenggarakan apa-apa cawangan atau cawangan-cawangan Institut di mana-mana tempat atau tempat-tempat di Malaysia atau di mana-mana jua sebagaimana yang Lembaga berpendapat bahawa adalah wajar bagi maksud menjalankan peruntukan Akta ini.

(2) Lembaga hendaklah melantik berkenaan dengan suatu cawangan, seorang Pengarah Cawangan yang hendaklah menjadi ketua eksekutif, pegawai pentadbiran dan akademik cawangan, dan dia hendaklah melaksanakan fungsinya dan menunaikan kewajipannya di bawah arahan dan kawalan Ketua Pengarah.

### **Kuasa Menteri untuk memberikan arahan**

**4o.** (1) Lembaga hendaklah bertanggungjawab kepada Menteri.

(2) Menteri boleh memberikan kepada Lembaga arahan yang bersifat am yang selaras dengan peruntukan Akta ini, yang berhubungan dengan pelaksanaan fungsi dan penjalanan kuasa Lembaga.

(3) Lembaga hendaklah melaksanakan segala arahan yang diberikan di bawah seksyen ini secepat yang dapat dilaksanakan.

### **Meterai perbadanan Institut**

**4P.** (1) Meterai perbadanan Institut boleh dari semasa ke semasa dipecahkan, ditukarkan, diubah dan dibuat baharu sebagaimana yang difikirkan patut oleh Lembaga.

(2) Meterai perbadanan Institut hendaklah disimpan dalam jagaan Ketua Pengarah dan hendaklah digunakan dengan kebenaran Lembaga.

(3) Meterai perbadanan Institut hendaklah dicapkan pada semua diploma dan sijil dan ditandatangani oleh—

(a) Ketua Pengarah atau, semasa ketiadaannya, seorang anggota lain Lembaga yang diberi kuasa secara bertulis oleh Lembaga; dan

(b) mana-mana orang lain yang diberi kuasa oleh Lembaga,

dan tandatangan itu hendaklah menjadi keterangan yang mencukupi bahawa meterai itu telah dicapkan dengan sewajarnya dan sepatutnya dan bahawa meterai itu adalah meterai Institut yang sah.

(4) Meterai Institut hendaklah diberikan pengiktirafan rasmi dan kehakiman.

(5) Apa-apa dokumen atau surat cara yang jika disempurnakan oleh seseorang yang bukan suatu pertubuhan perbadanan tidak dikehendaki supaya dimeterai boleh disempurnakan mengikut cara yang serupa oleh Institut; dan apa-apa dokumen atau surat cara itu boleh disempurnakan bagi pihak Institut oleh Ketua Pengarah, atau oleh mana-mana orang yang diberi kuasa secara bertulis oleh Lembaga secara am atau khusus.



### **Jawatankuasa Pengajian**

5. (1) Bagi maksud menjalankan fungsinya di bawah perenggan 4(a), Lembaga hendaklah melantik suatu Jawatankuasa Pengajian yang hendaklah membuat syor kepada Lembaga mengenai sukatan pelajaran yang sesuai yang dikehendaki berkenaan dengan apa-apa kursus pengajian, cara bagaimana peperiksaan bagi penganugerahan apa-apa diploma berkenaan dengan apa-apa kursus pengajian boleh dikendalikan, dan mengenai apa-apa perkara lain yang berhubungan dengan apa-apa kursus pengajian sebagaimana yang boleh dirujuk oleh Institut kepada Jawatankuasa Pengajian.

(2) Jawatankuasa Pengajian hendaklah termasuk orang yang berikut:

- (a) Ketua Pengarah yang hendaklah menjadi Pengerusi Jawatankuasa Pengajian;
- (b) Timbalan Ketua Pengarah;
- (c) seorang wakil daripada Suruhanjaya Koperasi Malaysia; dan
- (d) dua orang wakil daripada mana-mana institusi pengajian tinggi.

(3) Seorang pegawai kanan Institut hendaklah dilantik sebagai Setiausaha kepada Jawatankuasa Pengajian.

(4) Tertakluk kepada apa-apa arahan yang diberikan oleh Institut, Jawatankuasa Pengajian hendaklah menentukan tatacaranya sendiri.

(5) Pengerusi Jawatankuasa Pengajian boleh mengundang mana-mana orang lain untuk menghadiri mesyuarat Jawatankuasa Pengajian untuk memberi nasihat mengenai apa-apa perkara yang berhubungan dengan apa-apa kursus pengajian sebagaimana yang difikirkan patut oleh Jawatankuasa Pengajian.

### **Kuasa Lembaga untuk menubuhkan jawatankuasa lain**

5A. Lembaga boleh menubuhkan apa-apa jawatankuasa sebagaimana yang difikirkannya patut dan tertakluk kepada apa-apa arahan oleh Lembaga, suatu jawatankuasa yang dilantik sedemikian hendaklah menentukan tatacaranya sendiri.

**Kuasa meminjam**

6. Institut boleh, atas apa-apa terma dan syarat sebagaimana yang diluluskan oleh Menteri Kewangan, meminjam wang sebagaimana yang perlu bagi maksud menjalankan mana-mana fungsinya di bawah Akta ini.

**Kumpulan Wang dan Pemberian**

7. (1) Maka dengan ini ditubuhkan suatu kumpulan wang yang dikenali sebagai Kumpulan Wang Institut Koperasi Malaysia (kemudian daripada ini disebut “Kumpulan Wang”)—

- (a) yang ke dalamnya hendaklah dibayar segala wang yang diterima oleh Institut (sama ada secara caruman, pemberian, fi, pinjaman atau selainnya);
- (b) yang daripadanya hendaklah dibayar apa-apa bayaran sebagaimana yang diarahkan oleh Akta ini supaya dibayar daripada Kumpulan Wang; dan
- (c) hendaklah dibayar kepadanya wang yang diterima daripada Kumpulan Wang Amanah Pendidikan Koperasi.

(2) Parlimen boleh dari semasa ke semasa membuat pemberian wang kepada Institut.

**Kumpulan Wang Rizab**

7A. (1) Institut boleh menubuhkan dan menguruskan suatu Kumpulan Wang Rizab.

(2) Tertakluk kepada subseksyen (3), pembayaran ke dalam dan keluar daripada Kumpulan Wang Rizab hendaklah ditentukan oleh Lembaga.

(3) Kumpulan Wang Rizab tidak boleh digunakan selain bagi maksud Institut.

### **Kumpulan Wang Simpanan Bercarum**

**7B.** Institut boleh, dengan kelulusan Menteri dan dengan persetujuan Perbendaharaan, menubuhkan dan menguruskan suatu Kumpulan Wang Simpanan Bercarum bagi Ketua Pengarah yang dilantik di bawah seksyen 4L dan pegawai dan kakitangan yang dilantik di bawah seksyen 4M.

### **Perbelanjaan Institut**

**8.** Segala perbelanjaan Institut sebagaimana yang diluluskan oleh Menteri hendaklah dibayar daripada Kumpulan Wang.

### **Hadiah**

**8A.** (1) Lembaga boleh, bagi pihak Institut, menerima dengan cara pemberian, hadiah, pemberian berwasiat, bantuan, warisan atau selainnya, apa-apa harta dan wang sebagai bantuan kewangan Institut atas apa-apa syarat sebagaimana yang ditentukan oleh Lembaga.

(2) Apa-apa harta atau wang yang diterima oleh Institut di bawah subseksyen (1) hendaklah, tertakluk kepada terma dan syarat yang padanya harta atau wang itu diberikan dan diterima, digunakan oleh Lembaga untuk kesemua atau mana-mana maksud Institut mengikut Akta ini.

(3) Suatu daftar hendaklah disimpan berkenaan dengan semua harta dan wang yang diterima oleh Lembaga di bawah subseksyen (1), termasuk nama penderma dan apa-apa syarat khas yang padanya harta dan wang itu telah diberikan.

(4) Semua harta dan wang yang diberikan dan diterima bagi apa-apa maksud tertentu hendaklah digunakan dan ditadbirkan mengikut maksud yang baginya harta dan wang itu diberikan dan diterima dan hendaklah diakaunkan secara berasingan.

### **Pelaburan**

**9.** Aset Kumpulan Wang boleh, setakat yang aset itu tidak dikehendaki dibelanjakan oleh Institut di bawah Akta ini, dilaburkan ke dalam pelaburan

yang pada masa ini dibenarkan oleh undang-undang bagi pelaburan kumpulan wang amanah:

Dengan syarat bahawa Institut tidak boleh melabur dalam sekuriti yang dikeluarkan atau didaftarkan, atau harta lain yang terletak, di luar Malaysia kecuali dengan kelulusan Perbendaharaan.

### **Anggaran tahunan**

**10.** (1) Pengerusi Lembaga hendaklah, tidak lewat daripada satu bulan sebelum bermulanya setiap tahun kewangan, membentangkan di hadapan Lembaga suatu anggaran perbelanjaan bagi Institut (termasuk perbelanjaan modal) yang diluluskan oleh Menteri bagi tahun yang berikutnya mengikut butir-butir dan bentuk sebagaimana yang ditetapkan oleh Lembaga.

(2) Suatu salinan anggaran itu hendaklah dihantar kepada setiap anggota Lembaga tidak kurang daripada empat belas hari sebelum mesyuarat yang anggaran itu hendak dibentangkan.

### **Akaun dan audit**

**11.** (1) Institut hendaklah menyimpan akaun yang sepatutnya dan rekod lain berkenaan dengan operasinya dan hendaklah menyediakan penyata akaun berkenaan dengan setiap tahun kewangan.

(2) Akaun Institut hendaklah diaudit secara tahunan oleh Ketua Audit Negara atau oleh seorang juruaudit yang merupakan juruaudit syarikat yang diluluskan mengikut pengertian Akta Syarikat 2016 [*Akta 777*] yang dilantik oleh Lembaga.

(3) Selepas berakhir setiap tahun kewangan, dan sebaik sahaja akaun Institut diaudit, Institut hendaklah menyebabkan supaya suatu salinan penyata akaun itu dihantar kepada Menteri, bersama-sama dengan suatu salinan apa-apa pemerhatian yang dibuat oleh Ketua Audit Negara atau juruaudit lain yang dilantik di bawah subseksyen (2) mengenai mana-mana penyata atau akaun Institut.

(4) Menteri hendaklah menyebabkan supaya suatu salinan tiap-tiap penyata dan pemerhatian itu dibentangkan di hadapan setiap Majlis Parlimen.

### **Laporan tahunan**

**12.** (1) Lembaga hendaklah, tidak lewat daripada 30 April setiap tahun, menyebabkan supaya dibuat dan dihantar kepada Menteri suatu laporan berkenaan dengan kegiatan Institut sepanjang tahun kewangan yang dahulu yang mengandungi apa-apa maklumat yang berhubungan dengan perjalanan dan dasar Institut sebagaimana yang diarahkan dari semasa ke semasa oleh Menteri.

(2) Menteri hendaklah menyebabkan supaya suatu salinan tiap-tiap laporan itu dibentangkan di hadapan setiap Majlis Parlimen.

### **Akta Perlindungan Pihak Berkuasa Awam 1948**

**12A.** Akta Perlindungan Pihak Berkuasa Awam 1948 [*Akta 198*] hendaklah terpakai bagi apa-apa tindakan, guaman, pendakwaan atau prosiding terhadap Institut atau terhadap Lembaga, mana-mana anggota Lembaga, mana-mana anggota jawatankuasa, atau mana-mana pegawai, kakitangan atau ejen Institut berkenaan dengan apa-apa perbuatan, pengabaian atau keingkaran yang dilakukan oleh Institut atau olehnya, mengikut mana-mana yang berkenaan, atas sifat yang sedemikian.

### **Pekhidmat awam**

**12B.** Tiap-tiap anggota Lembaga, atau mana-mana pegawai, kakitangan atau ejen Institut, semasa menunaikan kewajipannya di bawah Akta ini sebagai anggota, pegawai, kakitangan atau ejen itu, hendaklah disifatkan sebagai pekhidmat awam mengikut pengertian Kanun Keseksaan [*Akta 574*].

### **Obligasi kerahsiaan**

**12C.** (1) Kecuali bagi maksud Akta ini atau apa-apa prosiding sivil atau jenayah di bawah mana-mana undang-undang bertulis, seseorang anggota

Lembaga, atau mana-mana pegawai, kakitangan atau ejen Institut, mana-mana anggota jawatankuasa, atau mana-mana orang yang diundang untuk menghadiri mana-mana mesyuarat Lembaga atau mana-mana jawatankuasa, tidak boleh menzahirkan apa-apa maklumat yang telah diperolehnya semasa menjalankan kewajibannya dan yang tidak disiarkan menurut Akta ini.

(2) Mana-mana orang yang melanggar subseksyen (1) melakukan suatu kesalahan dan boleh, apabila disabitkan, didenda tidak melebihi sepuluh ribu ringgit atau dipenjarakan selama tempoh tidak melebihi enam bulan atau kedua-duanya.

### **Prosiding sivil**

**12D.** Walau apa pun peruntukan mana-mana undang-undang bertulis yang berlawanan, dalam apa-apa prosiding sivil oleh atau terhadap Institut atau dalam apa-apa prosiding lain yang dalamnya Institut dikehendaki atau dibenarkan oleh mahkamah untuk diwakili, atau didengari, atau selainnya berhak untuk diwakili atau didengari, mana-mana orang atau pegawai Institut yang diberi kuasa bagi pihak itu melalui arahan khas atau am Ketua Pengarah, boleh bagi pihak Institut, memulakan prosiding itu atau hadir dalam dan mengendalikan prosiding itu dan boleh membuat semua kehadiran dan permohonan dan melakukan semua perbuatan berkenaan dengan prosiding itu bagi pihak Institut.

### **Perbuatan atau peninggalan yang dilakukan dengan suci hati**

**12E.** Tiada tindakan atau guaman boleh dibawa, dimulakan atau dikekalkan dalam mana-mana mahkamah terhadap—

- (a) Lembaga;
- (b) anggota Lembaga;
- (c) Institut;
- (d) mana-mana pegawai atau kakitangan Institut; atau
- (e) mana-mana orang yang bertindak secara sah bagi pihak Institut,

bagi apa-apa perbuatan atau peninggalan yang dilakukan atau ditinggalkan dengan suci hati pada menjalankan atau menunaikan kuasa atau kewajipannya di bawah Akta ini atas kepercayaan yang munasabah bahawa adalah perlu bagi maksud yang diniatkan untuk disampaikan.

### **Kuasa Lembaga untuk membuat kaedah-kaedah dan garis panduan**

**12F.** (1) Lembaga boleh membuat apa-apa kaedah-kaedah dan garis panduan sebagaimana yang perlu bagi maksud menguatkuasakan peruntukan Akta ini.

(2) Secara khususnya, dan tanpa menjejaskan keluasan subseksyen (1), kaedah-kaedah dan garis panduan itu boleh memperuntukkan kesemua atau mana-mana perkara yang berikut:

- (a) fungsi dan tugas pegawai dan kakitangan;
- (b) penentuan kehendak yang mengawal selia pengiktirafan dan penganugerahan diploma, sijil dan kelayakan yang setaraf untuk diberikan oleh Institut;
- (c) syarat dan kemasukan dan kebajikan pelajar;
- (d) borang yang dikehendaki bagi maksud Akta ini; dan
- (e) apa-apa perkara yang tergolong dalam kuasa Institut di bawah seksyen 4A.

### **Kuasa Menteri untuk membuat peraturan-peraturan**

**12G.** Menteri boleh membuat peraturan-peraturan—

- (a) yang memperuntukkan tatatertib pelajar Institut, termasuk menetapkan kesalahan tatatertib, hukuman tatatertib dan tatacara bagi prosiding tatatertib; dan
- (b) mengenai apa-apa perkara sebagaimana yang suai manfaat atau perlu bagi melaksanakan peruntukan Akta ini dengan lebih baik.

**Peletakhakan harta dan pemindahan hak dan liabiliti**

**13.** Semua harta alih atau harta tak alih yang, sebaik sebelum permulaan kuat kuasa Akta ini, telah terletak hak pada Maktab Kerjasama Tanah Melayu atau yang dipegang oleh atau bagi pihak Maktab Kerjasama Tanah Melayu, hendaklah, pada permulaan kuat kuasa Akta ini dan tanpa apa-apa jua pemindahhakan, penyerahhakan atau pemindahan, terletak hak pada Maktab atau berpindah kepada Maktab mengikut hakmilik, harta atau kepentingan yang serupa dan mengikut pemegangan dan bagi maksud yang serupa sebagaimana ia telah terletak hak atau dipegang sebaik sebelum Akta ini mula berkuat kuasa; dan segala hak dan liabiliti yang, sebelum sahaja Akta ini mula berkuat kuasa, menjadi hak dan liabiliti Maktab Kerjasama Tanah Melayu hendaklah apabila Akta ini mula berkuat kuasa menjadi hak dan liabiliti Maktab.

**Kecualian**

**14.** Peruntukan \*Akta Pelajaran, 1961 [*Akta 43 tahun 1961*], tidaklah terpakai bagi Institut.

---

**JADUAL**

(*Dipotong oleh Akta A1398*).

---

---

\*CATATAN—Akta Pelajaran 1961 [*Akta 43 tahun 1961*] telah dimansuhkan oleh Akta Pendidikan 1996 [*Akta 550*] m.b.p. 31 Disember 1997—lihat subseksyen 155(1) Akta 550.



## UNDANG-UNDANG MALAYSIA

**No. 35 tahun 1968**

### AKTA INSTITUT KOPERASI (PEMERBADANAN) 1968

#### SENARAI PINDAAN

Undang-undang yang meminda	Tajuk ringkas	Berkuat kuasa dari
P.U. (B) 324/1970	Pemberitahuan di bawah Seksyen 3 Ordinan Nama Jawatan 1949	31-12-1970
P.U. (B) 350/1976	Pemberitahuan di bawah Seksyen 3 Ordinan Nama Jawatan 1949	15-07-1976
Akta A430	Akta Audit (Pindaan) 1978	03-03-1978
P.U. (A) 348/1997	Perintah (Pemerbadanan) Universiti Pertanian Malaysia (Pindaan) 1997	03-04-1997
P.U. (A) 106/1998	Perlembagaan Universiti Putra Malaysia	15-03-1998
P.U. (A) 206/2004	Perintah Menteri-Menteri Kerajaan Persekutuan (No.2) 2004	27-03-2004
P.U. (A) 222/2009	Perintah Menteri-Menteri Kerajaan Persekutuan 2009	10-04-2009
P.U. (A) 383/2009	Perintah Menteri-Menteri Kerajaan Persekutuan (Pindaan) 2009	10-06-2009
Akta A1398	Akta Maktab Kerjasama (Perbadanan) (Pindaan) 2011	01-09-2011
Akta A1589	Akta Maktab Kerjasama (Pemerbadanan) (Pindaan) 2019	Bahagian II- 01-09-2011; Bahagian III dan Bahagian IV- 03-05-2019

---

## UNDANG-UNDANG MALAYSIA

**No. 35 tahun 1968**

### AKTA INSTITUT KOPERASI (PEMERBADANAN) 1968

#### SENARAI SEKSYEN YANG DIPINDA

Seksyen	Kuasa meminda	Berkuat kuasa dari
1	Akta A1589	03-05-2019
2	Akta A1589	01-09-2011
3	Akta A1589	03-05-2019
4	Akta A1589	01-09-2011
4A-4P	Akta A1589	01-09-2011
5	Akta A1589	01-09-2011
5A	Akta A1589	01-09-2011
7	Akta A1589	03-05-2019
7A	Akta A1589	01-09-2011
7B	Akta A1589	01-09-2011
8A	Akta A1589	01-09-2011
10	Akta A1589	01-09-2011
11	Akta A1589	01-09-2011
12	Akta A1589	01-09-2011
12A-12G	Akta A1589	01-09-2011
Jadual	Akta A1398	01-09-2011
Keseluruhan Akta	Akta A1589	03-05-2019

---